

Uvodno obraćanje visokog predstavnika i specijalnog predstavnika EU Valentina Inzka na inauguralnoj sesiji “Generacija BiH za Evropu”



Nova generacija građana za novi početak

Dame i gospodo,

Prije svega želim da vam zahvalim na učešću u ovoj dvodnevnoj konferenciji. Vjerujem da diskusije koje će se ovdje odvijati i prijedlozi koji se formulišu mogu pokrenuti radikalne promjene u Bosni i Hercegovini.

A malo je građana koji ne bi pozdravili takve promjene.

Status quo je daleko od zadovoljavajućeg.

Iako je napredak u ovoj zemlji u zastoju, u susjednim zemljama je došlo do ubrzanja.

Susjedne zemlje su pokazale da su spremne probati nova rješenja. Spremne su da se prilagode. One su definitivno odlučile da ne žele ono što su imale do sada.

One žele nešto bolje.

To je odluka koja se mora donijeti i ovdje u Bosni i

Hercegovini.

Nju moraju donijeti političari i nju moraju donijeti građani ako želimo da ova zemlja izađe iz trenutne bezizlazne situacije.

Vjerujem da ljudi u ovoj prostoriji mogu pokazati put ka nečem novom, nečem boljem. Nečemu što nije probano.

Vjerujem da možete ponuditi alternativu neuspjehu.

Ovoj zemlji treba takva alternativa.

Ona treba da nađe i primijeni kreativna rješenja za probleme koji su tu godinama. I treba da prihvati ono što funkcioniše.

Kao što svi znamo, dešavalo se upravo suprotno – došlo je do kobnog povratka na stavove i politiku iz prošlosti.

Rezultati toga su jasni i svako ih može vidjeti – nove i nepotrebne političke i socijalne tenzije, visoka stopa nezaposlenosti, pad životnog standarda i paralizovan sistem vlasti i uprave.

Zdrav razum nam govori da kada narod neke zemlje postaje siromašniji, kada vlasti te zemlje nisu u stanju da ispoštuju finansijske obaveze, kada škole i bolnice u toj zemlji nemaju dovoljno osoblja i sredstava i kada je jedina industrija koja ostvaruje rast korupcija i kriminal – nešto se mora mijenjati.

Vjerujem da prijedlozi koje formulišete na ovoj konferenciji mogu biti početak vraćanja zdravom razumu u bh. politici.

Vjerujem da možete pokrenuti potreban proces radikalnih promjena.

* * *

Nakon izbora politika se fokusirala na pogrešne prioritete, kao recimo:

- Na zapošljavanje ministara i vodećih administrativnih službenika, umjesto da se traži zaposlenje za stotine hiljada nezaposlenih radnika;

- Na slobodu medija – i to ne na to koliko je ona važno nego kako neki moćnici misle da bi je trebalo ograničiti.

I dok je fokus bio na tim pitanjima, izgubljeni su milioni evra međunarodne razvojne pomoći, jer se državne vlasti nisu mogle formirati na vrijeme za usvajanje godišnjeg budžeta.

Očigledno, političkom establišmentu u BiH očajnički trebaju nove ideje, nova energija, novi fokus. I upravo tu dolazite vi, uspješna nova generacija. Vaše svježije perspektive su potrebne da ovu zemlju pokrenu naprijed, kroz vaš rad i vaše mreže. Vi imate iskustvo kroz koje treba analizirati izazove sa kojima se susreću građani Bosne i Hercegovine, i preporučiti pravi put.

Građani moraju pružiti političkim liderima alternativu koja bi zamijenila politiku prošlosti i predložiti preporuke zasnovane na politici zdravog razuma. A uspješni i ambiciozni mladi ljudi poput vas koji ste danas ovdje nalaze se u osobito dobroj prilici da to efikasno urade.

Osam mjeseci nakon opštih izbora, stranke su se složile da je došlo vrijeme da započnu razgovori o mogućnosti formiranja vlade.

Građane nije trebalo ostaviti da čekaju osam mjeseci – ali barem je ozbiljan rad na formiranju Vijeća ministara konačno počeo, i to treba pozdraviti.

Stranačkim liderima se mora jasno reći da je prvi i najhitniji zadatak Vijeća ministara da se pozabavi skandaloznim i neodrživim nivoom nezaposlenosti i siromaštva, jadnim stanjem javnih usluga i sveprisutnosti kriminala i korupcije.

Ljudi su veoma ljuti što je dopušteno da se situacija ovako

pogorša. Jedini način da se ta ljutnja smanji je da se pokaže zdrav razum i vrati politici modernizacije i evropske integracije koja je prije nekoliko godina počela donositi pozitivne pomake u životnom standardu.

Status quo je neprihvatljiv: imamo Ustav koji negira osnovna ljudska prava, politički sistem koji garantuje zastoj i pogoduje opstrukcionistima, privredu koja nazaduje i političku elitu koja ne vidi nikakvu posebno hitnu potrebu da se to popravi.

Ako osmislite kreativne prijedloge za ozdravljenje Bosne i Hercegovine u političkom, ekonomskom i socijalnom smislu, mi u međunarodnoj zajednici ćemo vas podržati.

Prezentovanje takvih prijedloga novim vlastima bio bi legitiman i konstruktivan korak kako bi im se pomoglo da se vrate na pravi put.

Između ostalog, to znači provedbu Evropskog partnerstva i Sporazuma o stabilizaciji i pridruživanju – strategije za koju su se javno opredijelile sve glavne stranke.

Nadam se da ćete u sljedeća dva dana početi sa izradom uvjerljivih prijedloga i nadam se da ćete energično lobirati da nove vlasti usvoje i provedu vaše prijedloge.

Hvala vam.